



Број/Број: 01/a -50 – 1 – 15 – 73/10  
Сарајево/Sarajevo, 25. марта 2010.

DOM NARODA  
PARLAMENTARNE SKUPŠTINE  
BOSNE I HERCEGOVINE

**PREDMET: O b a v j e š t e n j e**

Predstavnički dom Parlamentarne skupštine BiH je, na 73. sjednici, održanoj 10., 16. i 23. marta. 2010., razmatrao materijale koji su u nadležnosti i Doma naroda, o čemu vas obavještavamo kako slijedi:

1. Prijedlog zakona o protuminskom djelovanju u Bosni i Hercegovini, predlagač: Vijeće ministara BiH, zakon broj: 01, 02 – 02 – 8 - 54/09, od 3. 6. 2009. (drugo čitanje), odgođeno izjašnjavanje na nastavku 71. sjednice Doma, održanom 10.2.2010.;
2. Prijedlog zakona o izmjenama i dopunama Zakona o osnovama sigurnosti saobraćaja na putevima u Bosni i Hercegovini, predlagač: Vijeće ministara BiH, zakon broj: 01, 02 – 02 – 3 - 8/10, od 19.1.2010. (drugo čitanje);
3. Prijedlog zakona o radnom vremenu, obaveznim odmorima mobilnih radnika i uređajima za evidentiranje u drumskom prijevozu, predlagač: Vijeće ministara BiH, zakon broj: 01,02 – 02 – 3 - 2/10, od 8. 1. 2010. (drugo čitanje);
4. Prijedlog zakona o izmjenama Zakona o klasifikaciji djelatnosti u Bosni i Hercegovini, predlagač: Vijeće ministara BiH, zakon broj: 01, 02 – 02 – 7 – 121 /09, od 23. 12. 2009. (drugo čitanje);
5. Prijedlog zakona o izmjeni i dopunama Zakona o carinskoj politici Bosne i Hercegovine, predlagač: Vijeće ministara BiH, zakon broj: 01,02-02-2-1/10, od 6.1.2010. (drugo čitanje);
6. Prijedlog zakona o zaštiti oznaka geografskog porijekla, predlagač: Vijeće ministara BiH, zakon broj: 01, 02 – 02 – 3 - 18/10, od 3. 2. 2010. (prvo čitanje);
7. Prijedlog zakona o zaštiti topografije integriranog kola, predlagač: Vijeće ministara BiH, zakon broj: 01,02 – 02 – 2 - 16/10, od 3. 2. 2010. (prvo čitanje);
8. Prijedlog zakona o industrijskom dizajnu, predlagač: Vijeće ministara BiH, zakon broj: 01,02 – 02 – 2 - 15/10, od 3. 2. 2010. (prvo čitanje);
9. Prijedlog zakona o žigu, predlagač: Vijeće ministara BiH, zakon broj: 01,02 – 02 – 5 - 14/10, od 3. 2. 2010. (prvo čitanje);
10. Prijedlog zakona o patentu, predlagač: Vijeće ministara BiH, zakon broj: 01,02 – 02 – 2 - 17/10, od 3. 2. 2010. (prvo čitanje);
11. Prijedlog zakona o izmjenama i dopunama Zakona o zaštiti tajnih podataka, predlagač: Vijeće ministara BiH, zakon broj: 01,02 – 02 – 8 - 19/10, od 4. 2. 2010. (prvo čitanje);

12. Prijedlog zakona o promociji malih i srednjih preduzeća i preduzetništva u Bosni i Hercegovini, predlagač: Vijeće ministara BiH, zakon broj: 01,02-02-4-12/10, od 28.1.2010. (prvo čitanje);
13. Prijedlog revidirane strategije Bosne i Hercegovine za provođenje Aneksa VII. Dejtonskog mirovnog sporazuma (akt Ministarstva za ljudska prava i izbjeglice BiH, broj 01 – 37 – 310 /10, od 15. 2. 2010.);
14. Izvještaj o radu Odbora za žalbe građana na rad policijskih službenika u policijskim tijelima BiH za period septembar – decembar 2009. (materijal Odbora za žalbe građana, broj: 03 – 50 – 1 – 60 – 6 - 2/10, od 27. 1. 2010.);
15. Prijedlog mjera za poboljšavanje uslova poslovanja u poljoprivrednoj i prehrambenoj industriji Bosne i Hercegovine (Vijeće ministara BiH, akt broj: 05 – 28 – 21 /10, od 8. 1. 2010.);
16. Razmatranje zaključka Zajedničke komisije za ljudska prava, prava djeteta, mlade, imigraciju, izbjeglice, azil i etiku, sa 18. sjednice, održane 5.2.2009., koji glasi:  
„ Traži se od Parlamentarne skupštine BiH pokretanje inicijative kod Ureda visokog predstavnika da se izvrši preispitivanje svih odluka visokog predstavnika kojim su smijenjena određena lica ili da visoki predstavnik donese odluku kojim će to ovlaštenje prenijeti na Instituciju ombudsmena BiH ili neku drugu instituciju.“
17. Imenovanje tri člana iz Predstavničkog doma u Zajedničku komisiju oba doma radi usaglašavanja identičnog teksta Zakona o duhanu Bosne i Hercegovine;
18. Davanje saglasnosti za ratifikaciju:
  - a) Kreditnog sporazuma između Bosne i Hercegovine i Kuvajtskog fonda za arapski ekonomski razvoj – Projekat Autoput Kakanj – Donja Gračanica,
  - b) Sporazuma o zračnom saobraćaju između Vijeća ministara BiH i Vlade Arapske Republike Egipat,
  - c) Sporazuma o zračnom saobraćaju između Vijeća ministara BiH i Vlade Sirijske Arapske Republike,
  - d) Sporazuma između Vijeća ministara BiH i Vlade Republike Moldavije o uzajamnom ukidanju viznog režima za nosioce diplomatskih i službenih pasoša.

#### **Ad.1.**

Dom je **usvojio** Zakon o protuminskom djelovanju u Bosni i Hercegovini, sa **šest amandmana** iz Izvještaja Zajedničke komisije za ljudska prava, prava djeteta, mlade, imigraciju, izbjeglice, azil i etiku, koji glase:

#### **Amandman I.**

U članu 8. riječi: „i na međunarodnom nivou“ brišu se.

#### **Amandman II.**

U članu 17. stav (2) mijenja se i glasi:

„ (2) Licima koja u operacijama humanitarnog deminiranja obavljaju poslove izviđanja i obilježavanja, čišćenja terena i objekata od mina, uključujući i podvodno tlo i objekte, prikupljanje i uništavanje eksplozivnih sredstava zaostalih iz rata, kontrole kvaliteta i poslova koji su na terenu usko povezani s navedenim poslovima (poslovi operativca, medicinara, vozača-radiooperatera, rukovaoca mašinama za deminiranje, vodiča psa) priznaje se penzijski staž u uvećanom trajanju od 18 mjeseci za svaku godinu staža osiguranja.“

U članu 17. iza stava (2) dodaje se novi stav (3) koji glasi:  
„(3) Za staž osiguranja iz stava (2) ovog člana dodatni doprinos za penzijsko osiguranje plaćaju pravna lica, organizacije i ustanove kod kojih su ta lica u radnom odnosu.“

#### **Amandman III.**

U članu 20. stav (2) iza riječi „predstavnicí“ riječi: „vlada i drugih domaćih i međunarodnih tijela i organizacija“ zamjenjuju se riječima: „Vijeća ministara, vlada entiteta i Brčko Distrikta BiH te drugih domaćih i međunarodnih tijela i organizacija.“

#### **Amandman IV.**

U članu 34. u tački d) riječi: „zdravstvenih ustanova koje odredi BHMACH“ mijenjaju se i glase: „zdravstvenih ustanova ovlaštenih za pregled radnika na radnim mjestima s povećanim rizikom.“

#### **Amandman V.**

Član 41. briše se.

#### **Amandman VI.**

Iza člana 60. dodaje se član koji glasi:

„Član 60a.

Do donošenja novih ili usklađivanja postojećih podzakonskih akata s odredbama ovih zakona primjenjivat će se podzakonski akti doneseni na osnovu Zakona o deminiranju u Bosni i Hercegovini.“

Dom je također **usvojio i tri amandmana** u skladu s članom 118. stav (3) Poslovnika Predstavničkog doma, koji glase:

#### **Amandman I.**

„U članu 9. stav (2) alineja e) mijenja se i glasi:  
e) podnosi izvještaje Vijeću ministara i Zajedničkoj komisiji za odbranu i sigurnost BiH, te redovno izvještava donatore o napretku u oblasti protuminskog djelovanja, u skladu sa izvještajima koje dostavi Agencija za protuminsko djelovanje u BiH“.

#### **Amandman II.**

U članu 19. u stavu (1) iza alineje d) dodaje se nova alineja e) koja glasi:  
„e) donacija iz privatnog sektora, međunarodnih organizacija i stranih vlada kroz organizacije ovlaštene da predstavljaju donatore u BiH i ugovaraju operacije protuminskog djelovanja u skladu sa uslovima donatora i u koordinaciji s Agencijom za protuminsko djelovanje u BiH.“

U članu 19. stav (2) mijenja se i glasi:  
„(2) Sredstvima iz stava (1) ovog člana, osim alineje e) ovog člana, upravlja Ministarstvo, u skladu s ovim zakonom i pravilnikom koji donosi Vijeće ministara i koriste se samo radi realizacije Projekta protuminskog djelovanja.“

#### **Amandman III.**

U članu 23. dodaje se novi stav (2) koji glasi:

„(2) Aktivnosti protuminskog djelovanja finansirane iz sredstava predviđenih u članu 19. stav (2) alineja e) bit će planirane i provedene u skladu sa uslovima donatora, a uvažavajući alineje navedene u stavu (1) ovog člana.“

## **Ad.2.**

Dom je **usvojio** Zakon o izmjenama i dopunama Zakona o osnovama sigurnosti saobraćaja na putevima u Bosni i Hercegovini u drugom čitanju, sa **osam amandmana** koji glase:

### **Amandman I.**

U članu 22. u stavu (1) iza riječi: “stav (2)” dodaju se riječi: “i (3)” .

### **Amandman II.**

U članu 42. Prijedloga zakona dodat je novi član 129b. i u članu 129b. u stavu (3) iza riječi: “za smještaj tereta“ dodaju se riječi: “vozila iz člana 129a. stav (2)”.

### **Amandman III.**

U članu 69. st. (2), (3) i (4) brišu se.

Dosadašnji stav (5) postaje stav (2).

### **Amandman IV.**

Članom 78. Prijedloga zakona dodat je novi član 234a. i u članu 234a. stav (1) tačka 2) brišu se riječi: “stav (2)”.

### **Amandman V.**

U članu 81. u stavu (1) briše se tačka 1a).

Dosadašnja tačka 1b) postaje tačka 1a).

### **Amandman VI.**

Član 83. mijenja se i glasi:

- (1) U članu 239. u tački 12) riječi „čl. 55 i“ zamjenjuju se riječju „član”.
- (2) U tački 17) iza riječi: „člana 81.“ dodaju se riječi: „i člana 82“.
- (3) Tačka 20) mijenja se i glasi:  
„20) vozač koji neispravno vozilo vuče suprotno odredbama člana 88.“;
- (4) U tački 21) riječ „tač.“ mijenja se riječju „stav“ a na kraju teksta dodaju se riječi: „kao i vozač koji upravlja traktorom bez upaljenog žutog rotacionog svjetla (član 90. stav (6))”.
- (5) Tačka 22) mijenja se i glasi:  
„22) gonič stoke koji stoku ne drži u skladu s odredbama člana 104. stav (2) i (4)“.
- (6) U tački 29) riječi: „stav (5)” zamjenjuju se riječima: „stav (7)”.
- (7) U tački 30) riječi: „član 183. stav (1)” zamjenjuju se riječima: „član 177. stav (5)“.
- (8) U tački 33) riječi: „saobraćajnu dozvolu” zamjenjuju se riječima: „potvrdu o registraciji”.

### **Amandman VII.**

Članom 84. Prijedloga zakona dodat je novi član 239a. i u članu 239a. u stavu (4) riječi: “stav (3)” zamjenjuju se riječima: “stav (4)”.

### **Amandman VIII.**

U članu 89. stav (2) briše se.

### **Ad.3.**

Dom je usvojio Zakon o radnom vremenu, obaveznim odmorima mobilnih radnika i uređajima za evidentiranje u drumskom prijevozu u drugom čitanju, s *jednim amandmanom* koji glasi:

### **Amandman I.**

U članu 39. stav (1) riječi: “ do 16.3.2010. godine” zamjenjuju se riječima: “do 16.6.2010. godine”.

### **Ad.4.**

Dom *je usvojio* u drugom čitanju Zakon o izmjenama Zakona o klasifikaciji djelatnosti u Bosni i Hercegovini.

### **Ad.5.**

Prijedlog zakona o izmjeni i dopunama Zakona o carinskoj politici Bosne i Hercegovine *nije dobio potrebnu entitetsku većinu*, pa slijedi usaglašavanje u Kolegiju doma kao komisiji.

### **Ad.6.**

Dom je *usvojio* Prijedlog zakona o zaštiti oznaka geografskog porijekla u prvom čitanju.

### **Ad.7.**

Dom je *usvojio* Prijedlog zakona o zaštiti topografije integriranog kola u prvom čitanju.

### **Ad.8.**

Dom je usvojio Prijedlog zakona o industrijskom dizajnu u prvom čitanju.

### **Ad.9.**

Dom je *usvojio* Prijedlog zakona o žigu u prvom čitanju.

### **Ad.10.**

Dom je *usvojio* Prijedlog zakona o patentu u prvom čitanju.

### **Ad.11.**

Dom je *usvojio* Prijedlog zakona o izmjenama i dopunama Zakona o zaštiti tajnih podataka u prvom čitanju.

#### **Ad.12.**

Dom je usvojio Prijedlog zakona o promociji malih i srednjih preduzeća i preduzetništva u Bosni i Hercegovini u prvom čitanju. Usvojen je i zaključak koji glasi:

**„Potrebno je organizirati javnu raspravu o predloženom tekstu Zakona.“**

#### **Ad.13.**

Dom je *usvojio* Prijedlog revidirane strategije Bosne i Hercegovine za provođenje Aneksa VII. Dejtonskog mirovnog sporazuma u prvom čitanju, s Mišljenjem Zajedničke komisije za ljudska prava, prava djeteta, mlade, imigraciju, izbjeglice, azil i etiku. Zaključci predloženi u raspravi upućeni su Zajedničkoj komisiji za ljudska prava, prava djeteta, mlade, imigraciju, izbjeglice, azil i etiku na razmatranje, nakon čega će Zajednička komisija provesti proceduru u skladu sa zaključkom Doma i dostaviti Izvještaj o Prijedlogu revidirane strategije za provođenje Aneksa VII. Dejtonskog mirovnog sporazuma. Zaključci su sljedeći:

1. Predstavnički dom PSBiH zadužuje Vijeće ministara BiH da u roku od tri mjeseca izradi Akcioni plan za realizaciju Revidirane strategije za provođenje Aneksa VII. Dejtonskog mirovnog sporazuma.  
Nosilac izrade Akcionog plana je Ministarstvo za ljudska prava i izbjeglice BiH, zajedno s predstavnicima svih institucija koje su učestvovala u izradi Strategije po principu nadležnosti.  
Akcionim planom bili bi precizirani rokovi, određeni konkretni izvršioc i potrebna sredstva za otklanjanje uočenih problema, provođenje preporuka i predloženih mjera iz Revidirane strategije u oblastima:
  - suštinskog okončanja procesa održivog povratka u BiH
  - sigurnosti povratnika
  - komunalne i socijalne infrastrukture
  - elektrifikacije povratničkih naselja
  - održivosti i reintegracije povratnika (zdravstvena zaštita, obrazovanje, rad i zapošljavanje, socijalna i penzijsko- invalidska zaštita)
  - ostvarivanja prava na povrat imovine i stanarskih prava.
2. Razmatrajući Prijedlog revidirane strategije Bosne i Hercegovine za provođenje Aneksa VII. Dejtonskog mirovnog sporazuma, Predstavnički dom posebno podržava prijedlog mjera na polju održivosti i reintegriranja povratnika (zdravstvena zaštita, obrazovanje, rad i zapošljavanje, socijalno i penzijsko-invalidsko osiguranje) i traži od nadležnih institucija da, u što kraćem roku, a ne dužem od 15 dana, predloži konkretne mjere.
3. Dodatak tačke 4.3.11. (strana 44): Budući da je zaposlenje jedan od najvažnijih uslova za održivi povratak, a s ciljem podsticanja povratka u cijeloj BiH, svi državni organi, a prije svih Ministarstvo odbrane BiH, Granična policija te UIOBiH će pri zapošljavanju prednost dati povratnicima.
4. Formulacija kompenzacije sa strane 52 tačka 6.1. mijenja se formulacijom iz Aneksa VII. Dejtonskog mirovnog sporazuma koja je navedena u stavu 2. na strani 1. Dodatka 2.

5. Predstavnički dom PSBiH traži od Vijeća ministara BiH da u svim operativnim aktivnostima rješavanja pitanja raseljenih i izbjeglih lica, povratak i ostanak tretiraju u skladu s Aneksom VII. Dejtonskom mirovnog sporazuma.

**Ad.14.**

Dom je **usvojio** Izvještaj o radu Odbora za žalbe građana na rad policijskih službenika u policijskim tijelima BiH za period septembar – decembar 2009.

**Ad.15.**

Dom je **usvojio** Prijedlog mjera za poboljšavanje uslova poslovanja u poljoprivrednoj i prehrambenoj industriji Bosne i Hercegovine s Mišljenjem Komisije za vanjsku trgovinu i carine.

U raspravi je usvojen i sljedeći zaključak:

**„Uz zaključke Komisije za vanjsku trgovinu i carine treba dodati i riječi: „rokove iz prijedloga mjera treba uskladiti s vremenom prihvatanja mišljenja Komisije.“**

Usvojeni zaključak iz Mišljenja Komisije sada glasi:

**„Obavezuje se Ministarstvo vanjske trgovine i ekonomskih odnosa BiH da, dva puta godišnje, dostavlja Parlamentarnoj skupštini BiH informaciju o odnosima bilansa potreba i stanja koji uključuje vanjskotrgovinske bilanse za proizvode iz tač. 1. i 2. Prijedloga mjera za poboljšavanje uslova poslovanja u poljoprivrednoj i prehrambenoj industriji Bosne i Hercegovine. Rokove iz prijedloga mjera treba uskladiti s vremenom prihvatanja mišljenja Komisije“**

**Ad.16.**

Dom je **usvojio** zaključak Zajedničke komisije za ljudska prava, prava djeteta, mlade, imigraciju, izbjeglice, azil i etiku, sa 18. sjednice, održane 5.2.2009., koji glasi:

**„Traži se od Parlamentarne skupštine BiH pokretanje inicijative kod Ureda visokog predstavnika da se izvrši preispitivanje svih odluka visokog predstavnika kojim su smijenjena određena lica ili da visoki predstavnik donese odluku kojim će to ovlaštenje prenijeti na Instituciju ombudsmena BiH ili neku drugu instituciju.“**

**Ad.17.**

Dom je **imenovao** Velimira Jukića, Slavka Jovičića i Mehmeda Suljkanovića u Zajedničku komisiju oba doma radi usaglašavanja identičnog teksta Zakona o duhanu Bosne i Hercegovine.

**Ad.18.**

Dom je **dao saglasnost** za ratifikaciju:

- a) Kreditnog sporazuma između Bosne i Hercegovine i Kuvajtskog fonda za arapski ekonomski razvoj – Projekat Autoput Kakanj – Donja Gračanica,
- b) Sporazuma o zračnom saobraćaju između Vijeća ministara BiH i Vlade Arapske Republike Egipat,
- c) Sporazuma o zračnom saobraćaju između Vijeća ministara BiH i Vlade Sirijske Arapske Republike,

- d) Sporazuma između Vijeća ministara BiH i Vlade Republike Moldavije o uzajamnom ukidanju viznog režima za nosioce diplomatskih i službenih pasoša.

PREDSJEDAVAJUĆI  
PREDSTAVNIČKOG DOMA  
**dr. Milorad Živković, s.r.**